



Maqaalee Rabbii (Subhaanahu)-Kutaa 4.1

Description

Al-Hayy, Al-Qayyuum

Imaamu Ibn Al-Qayyim (rahimahullahu) akkana jedha: “Jaalalli muka qalpii keessa jiruudha. Hiddi isaa jaallatamaaf of gadi qabuudha, jirmii isaa immoo Isa beekudha. Dameen isaa Isa sodaachudha. Baalli isaa immoo Isa saalfachuudha. Firiin isaa Isaaf ajajamuudha. Albuunni dhugaatii fi [soorata] isaaf ta’u immoo Isa yaadachuu fi faarsudha (zikriidha). Yeroma jaalalli wantoonni kanniin keessaa tokko dhabe, hir’uu ta’ a.[\[1\]](#)”

Jaallatamaan hundarra jaallatamu qabu Rabbii olta’eedha. Isa caalaa fi Isa waliin wanti jaallatamu hin jiru. Wanti tokko Isa caalaa ykn Isa waliin yoo jaallatame shirkii guddaa ta’ a. Isaa gaditti wanti jaallatamu faarfamaa kan ta’ u, Isaaf jedhanii yoo jaallataniidha. Akkuma jecha Ibn Al-Qayyim keessatti argine mukni jaalalaa qalpii keessatti guddatu hidda, jirma, damee, baalaa fi firii qaba. Jaalalli nuti Rabbii Olta’ aaf qabnu kana hunda akka baafatuuf carraaqqi nurraa barbaadaa miti ree? Karaan hundarra gaariin kana galmaan itti gahan waa’ee maqaalee fi sifaataa Isaa ilaachise beekumsa qabaachudha. Kutaa darbe irraa itti fufuun maqaalee Rabbii subhaanahu wa ta’alaa haa ilaallu:

A.Hiika Al-Hayy fi Al-Qayyuum

Akka lugaatti “Al-Hayy” jechuun “Jiraataa” jechuudha. Jireenyi faallaa du’ aati. Jiraataan faallaa wanta du’ eeti. Rabbiin Jiraataa yeroo hundaa turaa ta’ e, du’ aa fi badiinsi gonkumaa Isa hin qunnamneedha. Inni kana hundarraa qulqulla’ e olta’ e.

Xabariin tafsiir isaa keessatti ni jedha: “Al-Hayy (Jiraataan) Kan hin duunee fi hin banneedha. Isaa gaditti wantoonni akka gooftaatti ilaallamuun gabbaraman hundi ni du’u, ni badu. Namoota irrattiakkana jechuun falma: Kan hin bannee fi hin duune gaditti wanti baduu fi du’uu gabbaramaagabbaramuu ta’uu hin danda’u. Sababni isaas, Gabbaramaan [ykn Gooftaan] Kan yeroo hundaa turugonkumaa hin duunee fi hin banneedha. Kunis Rabbii Isa malee haqaan gabbaramaan hin jirreedha.”(Jaami’u Al-Bayaan 3/109) (Wantoonni Rabbii gadi jiran hundi waan du’aniif ykn badaniif gooftaagabbaramu ta’uu hin danda’an. Rabbiin immoo yeroo hundaa jiraataa hin duunee fi hin bannee waanta’eef Gooftaa haqaan gabbaramuudha.)

Hiika Al-Qayyuum

Maqaa al-Qayyuum jedhuuf hiika hayyooni baay’een kennan bakka lama jalatti guduunfuun ni danda’ama^[2]:

Iffaa– Al-Qayyuum jechuun Ofiin dhaabbataa fi Of-Danda’aa homattu hin hajamne.

2ffaa– Al-Qayyuum jechuun uumamtoota hundaa Kan dhaabe. Kana jechuun uumamtoota hundaa kan argamsisee, dhaabu, jiraachisu fi eegu Rabbiidha. Uumamtooni hundi Isatti hajamu. Isa malee gonkumaa of danda’ani dhaabbachuu fi jiraachu hin danda’an.

Ibn Al-Qayyim ni jedha: “Al-Qayyuum jechuun Ofiin Kan dhaabbate fi Isaan ala wantoota jiran hunda Kan dhaabudha.” (Sawaa’iqu Al-Mursalati 4/1327,1329)

B.Sifaata Maqaaleen kunniin of keessatti qabatan

Maqaa Al-Hayy (Jiraataa) jedhu keessa sifata (amala) jirenyatu jira. wanta tokkoon jiraataadha yoo jette, jirenya ni qabaa jechuudha. Akkuma qajeelfama bu’ura Asmaa’ a wa sifaata keessatti ilaalle, sifaanni Rabbii fi sifaanni uumamtootaa wal hin fakkaatan. Kanaafu, jirenyi Rabbii fi jirenya uumamtoota wal hin fakkaatan. Jirenyi Rabbii jirenya guutuu badiinsaan hin durfamnee fi yoomiyuu duuti hin qunnamneedha. Hanqinni fi hir’inni wayitu gonkumaa Isa hin tuqu. Gooftaan keenya kana hundarraa qulqullaa’e olta’e. Qur’aana keessatti ni jedha:

? ?????????? ?????? ??????? ?????? ??? ?????? ?????????? ??????????????

“[Yeroo hundaa] Jiraataa gonkumaa hin duune irratti hirkadhu. Faaruu Isaatiniis Isa [faarsii] qulqulleessi.” suuratu Al-Furqaan 25:58

Ibn Al-Qayyim ni jedha: “Jirenyi Rabbii jirenya hundarra guutuu taatedha. Jirenya sifaataa (amaloota) gugguutuuf barbaachistudha. Gama kaminiyyuu faallaa ishii ni dhabamsiifti. Wantaa jirenyan wal-qabatan keessaa tokko hojii filannoon hojjachuudha. Jiraataan hundi hojjataadha. Jiraataa irraa hojiin argamu guutummaa fi hir’inna jirenya isaa irratti hundaa’aa. Kan jirenyi isaa hunda caalaa guutuu taate, akkasuma hojiin isaas hunda caalaa jabaa fi guutuu ta’aa. Dandeettin isaas akkanuma. Kanaafi, Rabbiin subhaanahu waan hundaa irratti Danda’aa ta’e, wanta fedhe hunda hojjata. (Rabbiti jirenyi Isaa gara hundaan guutuu waan taatef Inni waan hundaa irratti Danda’aadha.)” Shafaa’u Al-Aliili-1/187)

Al-Qayyuum dhimmoota lama agarsiisa:

Iffaa– Durummaan Rabbii guutuu ta’uu. Inni Of Danda’aa uumamtoota Isaa irraa Dureessa ta’eedha. Akkuma Kitaaba Isaa keessatti jedhe:

﴿ يَا أَيُّهَا النَّاسُ أَنْتُمُ الْفُقَرَاءُ إِلَى اللَّهِ وَاللَّهُ هُوَ الْغَنِيُّ الْحَمِيدُ ﴾^{١٥}

“Yaa namoota! Isinumatu gara Rabbiiitti hajamoodha. Rabbiiin Isumatu Dureessa Faarfamaa dha.” Suuratu Faaxir 35:15 (Namoonni gara hundaan Rabbii olta'aatti hajamu. Gonkumaa Isarrraa of danda'anii jiraachu hin danda'an. Uumama isaaniitiif Isatti hajamu. Osso Inni isaan argamsiisu baate silaa hin argaman (hin uumaman). Humna fi kutaalee qaamaatiif Isatti hajamu. Osso Inni kutaalee qaama fi humna isaaniif kenu baatee silaa eessaa argatu? Soorataa fi qananii keessaa fi alaatiif Isatti hajamu. Osso tola Isaatiin isaaniif laaffisuu baatee silaa soorataa fi qananii wayitu hin argatan. Rakkoo fi wanti jibban akka isaan irraa deebi'uuf Isatti hajamu. Osso Inni isaan irraa deebisuu fi rakkoo isaan irraa saaqq baate silaa rakkinni fi ulfaatinni isaan keessa jiran itti fufa.[\[3\]](#) Kanaafu, namoonni gara hundaan Isatti hajamu. Garuu Inni Dureessa Faarfamaadha.)

2ffaa-Dandeetti fi Too'annaan Isaa guutuu ta'uu- Inni Dandeetti Isaatin uumamtootaa hunda kan dhaabu fi jiraachisuudha. Uumamtoonni hundi gara Isaatti hajamu. Libsu ijaatiif Isarrraa of danda'anii jiraachu hin danda'an. Arshiin, Kursiyyiin, samiwwan, dachiin, gaarreen, mukkeen, namoonni, beelladonni, bineensonni hundi isaanitu gara Rabbii olta'atti hajamu. [\[4\]](#) Qur'aana keessatti ni jedha: “**Dhugumatti, Rabbiiin samii fi dachiin [bakka isaaniitii] akka hin deemne qaba. Osso bakkaa deemanii Isa malee wanti tokkoyyuu isaan lamaan hin qabu. Dhugumatti, Inni Obsaa, Araaramaa ta'eera.**” Suuratu Faaxir 35:41, “**Mallattoolee Isaa irraa samii fi dachiin ajaja Isaatiin dhaabbachuudha.**” Suuratu Ar-Ruum 30:25

Dhimmoota lamaan armaan olitti kaasne Ibn Al-Qayyim akkana jechuun guduunfa: Al-Qayyuum guutummaa durummaa Isaatii fi guutummaa Dandeetti Isaa of keessatti hammata. Sababni isaas, Inni Ofiin Kan dhaabbateedha, gama kaminiyyuu kan Isa dhaabutti gonkumaa hin hajamu. Kuni wantoota Isaan ala jiran hundarrraa Dureessa fi Of danda'aa ta'uu Isaa irraayyi. (Kana jechuun gara hundaan Dureessaa fi Of Danda'aa waan ta'eef homattu hin hajamu.) Ammas, Inni wantoota Isaan ala jiran Kan dhaabudha. Wantoonni Isaan ala jiran yoo Inni isaan hin dhaabin dhaabbachuun isaaniif hin jiru. Kuni immoo guutummaa dandeetti fi Jabeenya Isaa irraayyi. (Kana jechuun Dandeetti fi jabeenya guutuu waan qabuuf uumamtoota hunda Kan dhaabu, jiraachisuu fi eegu Isa.)” (Bidaa'u Al-Fawaa'id 2/410)

Maqaaleen Rabbii gaggaariin Al-Hayy Al-Qayyuum irra naanna'u

Wanta darbe irraa maqaaleen lamaan kanniin “Al-Hayy Al-Qayyuum” hiika maqaalee gaggaarii hunda walitti kan qabaniidha. Isaan lamaan irra maqaaleen gaggaariin naannawu. Hiikni isaanii hundi gara isaan lamaanitti deebi'a. Sifaanni Rabbii subhaanahu maqaalee kanniin lamaanitti deebi'an waan ta'eef.

Maqaan “**Al-Hayy (Jiraataa)**” jedhu- sifaata Zaataa walitti qaba. Sifaanni Zaata kanneen akka dhagahuu, arguu, harka, beekumsa fi kan kana fakkaatan. (Jiraataan beekumsa kan qabu, dhagahu, arguudha). Al-Qayyuum immoo sifaata hojiwwanii (Al-Af’ala) walitti qaba. Kanneen akka uumuu, razzaquu (sooru), qananiisu, jiraachisuu, ajjeesu fi kkf. (Hiika Al-Qayyuum keessaa tokko uumamtoota kan dhaabu waan ta’eef, Inni ni uuma, ni soora, ni qananiisa, ni jiraachisa, ni ajjeesa yeroo fedhettilamuu ni kaasa.) Kanaafi, hayyooni gariin maqaaleen lamaan kunniin maqaalee gurguddaa yoo Rabbiinttiin kadhatame deebii itti deebisuudha jedhan.[\[5\]](#)

Hiribaa fi Mugaatiin hiika maqaalee armaan olii kanniin waan faallessaniif Rabbiif hin malan

Qur'aana keessatti “**Allaah, Isa malee haqaan gabbaramaan hin jiru, [Inni] Al-Hayy Al-Qayyuum. Mugaatis ta’e hirribni Isa hin qabu.**” (Suuratu Al-Baqarah 2:255)

Hiika sadaffaa Al-Qayyuum jalqabatti hin kaasne kaasun mee kutaa kana haa xumurru. “**Hiika Al-Qayyuum** keessaa tokko **yeroo hundaa turaa hin banneedha**. Hiika kanatti sheykhul Islaama ibn Taymiyaan (rahimahullahu) akkana jechuun akeeke jira: Maqaan Al-Qayyuum jedhu hiika “Inni kan hin banne ta’uu” of keessatti qabata. Guutummaa Isaa booda gonkumaa hir’uu hin ta’u. Inni duraanis turaadha, ammaa fi gara fuunduraattis turuu itti fufa, abadii azalii sifaata guutuudhaan kan ibsamuudha. (Azalii jechuun jalqabaa fi dhuma kan hin qabnee yeroo hundaa jiraataa kan ta’e.) Osoo hir’inni itti hin argamin ykn osoo hin jijjiramin Inni yeroo hundaa turaadha. Rabbiin subhaanahu wa ta’alaa Al-Qayyuum. Kanaafi, haala guutuu ta’een Al-Qayyuum ta’uu irraa kan ka’e hin badu, hirribni fi mugaatin isa hin qaban. Hiribaa fi mugaati keessa badiinsa hiika Al-Qayyuum faallessutu jira. Jireenyi, beekumsi fi dandeettin guutuun hiribaa fi muguu keessatti waan hir’ataniif. Nama hin rafne waliin wal bira yommuu qabamu namni rafe hanqinni beekumsaa, dandeetti, dhagahuu, arguu, dubbachuu fi kan biroo isa qunnama. Kanaafi, hirribni obboleessa du’ati jedhama.[\[6\]](#)” Namni rafee akka nama du’eeti. Hanga hiribaa dammaqutti wanta naannawa isaatti raawwatamu hin beeku, hin argu, hin dhagahu, hojii biroo hojjachuu hin danda’u. Rabbiin subhaanahu wa ta’alaa wantoota hundaa halkanii guyyaa kan dhaabu, jiraachisu, too’atu, eegu, qindeessu waan ta’eef gonkumaa hin rafu, hin mugu.

Guduunfaa

?**Al-Hayy** jechuun **Jiraataa** jechuudha. Rabbiin subhaanahu Al-Hayy (Jiraataa) gonkumaa hin duunee fi hin banneedha.

?**Al-Qayyuum** jechuun Of Danda’aa homattu hin hajamne, wantoota hundaa kan dhaabu, jiraachisu fi eegudha. Akkasumas, Al-Qayyuum jechuun yeroo hundaa turaa gonkuma hin banneedha.

?Maqaan Al-Hayy (Jiraataa) jedhu Rabbiin jireenyaa guutuu hanqinna wayitu hin qabne akka qabu agarsiisa.

?Maqaan Al-Qayyuum jedhu immoo waa lama agarsiisa: **1ffaa**-Rabbitin gara hundaan dureessaa fi of danda’aa ta’uu. **2ffaa**-Dandeettin, jabeenyi fi too’annaan Rabbii guutuu ta’uu.

?Hirribni fi mugaatin amaloota armaan olii waan faalleessaniif Rabbii olta’af hin malan. Subhaanahu wa ta’alaa=Inni Qulqullaa’e olta’e

Kitaabban wabii

[\[1\]](#) Rawdatul Muhibbiin 554

[\[2\]](#) Tafsiiru Qur'aanil Kariim-Faatiha wa Baqarah-3/251 ibn Usyemiin, [Fatawa Ibn Baaz](#)

[\[3\]](#) Tafsiiru Sa’dii-fuula 806-807

[\[4\]](#)

[Fiqhu Al-Asmaa' il Husnaa](#)– fuula 88, Abdurazzaaq bin AbdulMuhsin Badri

[5] Madda olii

[6] [Walillahi asmaa' ul Husnaa fad'uuhu bihaa](#)– lakk. 7 fi 8, AbdulAziz bin Naasir Jaliil

Date Created

September 5, 2019

Author

admin